

AKTIVIS MUDA

Bangkit jadi peguam selepas pernah alami kesusahan

► NAZRY MOKHTAR
nazry@sph.com.sg

DUNIA Encik Ahmad Firdaus Daud pernah dibaluti gerhana selepas keluarganya dilanda kesempitan wang.

Ayahnya diberhentikan kerja dan bagaikan sudah jatuh ditimpa tangga, mengalami kerugian pula dalam satu pelaburan hartanah.

Namun, langit tidak selalu cerah, mendung bukan selamanya.

Yang penting, kesempitan wang tidak menghalang beliau daripada memburu cita-cita.

Kini, hasil usaha tidak kenal lelah, Encik Ahmad Firdaus boleh berbangga dengan pencapaiannya.

Pemuda berusia 33 tahun itu bertugas sebagai seorang peguam di firma Taylor Vinters Via dan mempunyai pengkhususan dalam bidang undang-undang teknologi.

Namun, kejayaan tidak datang bergolek begitu sahaja.

Kelulusan ala kadar dek terlalu banyak bermain daripada belajar di maktub rendah hampir mematahkan langkahnya mahu ke universiti.

Mujurlah, permohonanannya ke Universiti Pengurusan Singapura (SMU) diterima.

Dek tidak mahu pisang berbuah dua kali, Encik Ahmad Firdaus menumpukan perhatian pada pelajaran dan akhirnya berjaya meraih anugerah Magna Cum Laude bagi ijazah Sarjana Muda Sains (Pengurusan Sistem Maklumat).

Anugerah itu disampaikan kepada antara 35 peratus mahasiswa terbaik universiti itu.

"Setiap orang ada mengalami tempoh sukar dalam hidup mereka. Keluarga saya begitu juga dan kami bertarung dengan masalah kewangan buat satu tempoh yang lama.

"Pengalaman ini mengajar saya erti ketabahan dan kesyukuran," kata beliau, anak seorang jurulatih kemahiran dan suri rumah yang pernah memiliki butik pakaian wanita.

Selepas tamat pengajian, bekas Presiden Persatuan Pelajar SMU itu menyertai perkhidmatan awam, mula-mula dengan Kementerian Perdagangan dan Perusahaan (MTI) dan kemudian dengan Kementerian Pembangunan Masyarakat, Belia dan Sukan (MCYS).

Didorong semangat ingin memberi sumbangan lebih bermakna kepada masyarakat, Encik Ahmad Firdaus kemudian memutuskan agar mengubah haluan kerjayanya dengan menjadi peguam.



Impian itu tercapai selepas beliau berjaya menamatkan program Doktor Juris (JD) di Sekolah Undang-Undang SMU yang membolehkan kerjayanya pertengahan kerjaya menjalan pengajian menjadi peguam.

"Saya sudah lama memendam hasrat menjadi peguam. Pengalaman di perkhidmatan awam menguatkan azam saya agar memberi sumbangan lebih bermakna dengan menjadi peguam," kata bekas pelajar Sekolah Menengah Tanjong Katong dan Maktub Rendah Saint Andrew's itu.

Kini, kepakaran dan pengalaman sebagai peguam amat berharga dalam usahanya menyumbang balik kepada masyarakat.

Malah, senarai penglibatan ma-

syarakatnya agak panjang lebar dan meliputi pelbagai bidang.

Encik Ahmad Firdaus baru dilantik sebagai Setiausaha Agung Majlis Pusat lewat tahun lalu dan kini giat melakarkan hala tuju baru bagi badan kebadayaan itu bersama pasukan baru.

Sebagai anggota Jawatankuasa Pengumpulan Dana bagi Dana Amanah Pendidikan (ETF), beliau dan pasukannya telah menetapkan matlamat mahu mengumpul \$12 juta untuk menampung keperluan pendidikan anak Melayu/Islam daripada keluarga susah.

Penglibatannya tidak tertumpu pada masyarakat Melayu/Islam semata-mata, malah menjangkau ke peringkat nasional.

Ini dilakukan menerusi penyertaannya sebagai anggota Majlis Mencegah Penyalahgunaan Dadah Kebangsaan (NCADA) dan Jawatankuasa Perundingan Rakyat (CC) Chong Pang.

Sebelum ini, beliau pernah melitabkan diri sebagai anggota jawatankuasa SG50Kita, Suara Musyawarah dan Young AMP.

"Saya prihatin tentang nasib masyarakat Melayu/Islam kita dan mahu memberi sumbangan yang termampu. Khususnya, saya berminat membantu golongan muda meletakkan asas untuk berjaya dan memenuhi potensi mereka sepenuhnya," kata beliau yang kini tinggal bersama ibu bapanya di flat empat bilik mereka di utara Singapura dan bakal

mengakhiri zaman bujangnya Julai ini.

Ditanya penilaiannya terhadap pencapaian masyarakat Melayu/Islam, beliau berkata masyarakat Melayu/Islam telah mencapai banyak kemajuan dan boleh disifatkan sebagai antara masyarakat minoriti paling berjaya di dunia.

"Tentu terdapat beberapa aspek yang masih boleh diperbaiki. Contohnya, kita perlu meningkatkan perniagaan ke peringkat global.

"Kedua, kita harus pastikan tiada anggota masyarakat tercicir dalam arus kejayaan dengan memastikan tiada kanak-kanak yang berhenti sekolah dan mengukuhkan lagi rangkaian keselamatan sosial kita," ujar beliau.

BIODATA

Nama: Encik Ahmad Firdaus Daud
Umur: 33 tahun
Kerjaya: Peguam di firma Taylor Vinters Via dan mempunyai pengkhususan dalam bidang undang-undang teknologi
Kerja kemasyarakatan: Beliau merupakan Setiausaha Agung Majlis Pusat dan anggota Jawatankuasa Pengumpulan Dana bagi Dana Amanah Pendidikan (ETF). Beliau juga anggota Majlis Mencegah Penyalahgunaan Dadah Kebangsaan (NCADA) dan Jawatankuasa Perundingan Rakyat (CC) Chong Pang
Status: Belum berumah tangga

CAPAI IMPIAN JADI PEGUAM:

Encik Ahmad Firdaus bertukar haluan daripada kerjaya dalam perkhidmatan awam kepada bidang guaman. - Foto NAZRY MOKHTAR